

## planntachadh



Chan eil mòran choilltean nàdarrach air am fàgail anns an rìoghachd seo an-diugh oir, thar cheudan bhliadhnachan thathas air a bhith a' leagail chraobhan.

Ⓔ Dèan liosta de na diofar rudan airson am bi sinn a' cleachdadh fiodh.

Tha aig daoine ri craobhan a chur gus am bi fiodh gu leòr againn. Tha craobhan le fiodh bog a' fas gu math luath an taca ri craobhan le fiodh cruaidh. 'S e cuid de chraobhan durcain eil-thìreach as luaithe a tha a' fàs. Tha iad cuideachd a' fàs gu math àrd agus gheibh sinn clàran math fiodh asda. Mar sin 's e giuthais Sitka (à Ceann a Tuath Ameireagaidh), giuthais Nirribheach no larag Iapanach is tric a chì thu air a' chuid as motha de phlanntachaidh.

Ⓔ Tadhal air coille sheargach as t-earrach no as t-samhradh. Leig ort gur e luch no daolag a th' annad. Laigh air do dhruim agus coimhead suas agus èisd. A bheil thu a' faicinn na flùran mun cuairt ort, agus duilleach nam preas 's nan craobhan os do chionn? Ma tha a h-uile duine sàmhach, èisd ris na fuaimean mun cuairt ort. An cluinn thu na h-eòin a' seinn?

Coimhead ri feadhainn de na craobhan. Cleachd teip-tomhais agus le cuideachadh bho charaid, sgrìobh sìos dè cho fada 's a tha feadhainn de na craobhan bho chèile. Cuir an teip mun cuairt feadhainn de na stocan agus tomhais dè cho tiugh 's a tha iad. Feuch gun tomhais thu eisimpleirean de chraobhan mòra agus craobhan beaga.

Ⓔ An uair sin tadhal air planntachadh forsaireachd. Lorg brat tiugh de shnàthadan giuthais agus laigh air do dhruim agus èisd. Dè tha thu a' faicinn? Dè tha thu a' cluinntinn? Am bu toigh leat a bhith nad luch a' fuireach anns a' choille seo? Tomhais dè cho fada 's a tha na craobhan bho chèile agus dè cho tiugh 's a tha na stocan. Dèan còmhraidh ris a' chlas agus ris an tidsear air mar a tha a' choille seo diofraichte bhon choille sheargach air an do thadhal sibh roimhe.



coille